

տանեալ զմեզ, տուաքէ թուղթս յամենայն քաղաքս և 'ի գաւառս Տէրութեան ձերոյ, որք լի են ստութեամբ եւ զրպարտանօք, որովհետեւ ոչ ինչ կարաց հաստատել զիրս ինչ յայտնի վկայութեամբ 'ի վերայ իմ և իմոցս. ապա զհետ եղեւ զրպարտութեամբ և թշնամանօք հնարել ըզթուղթս եւ առիթ լինել խռովութեան և երկպառակութեան ժողովրդոց: Եւ ապա խնդրէ դատ առնել ըստ օրինաց: Գրեցաւ հրովարտակ առ Կուսակալս Կարնոյ, Տիգրանակերտի, Սեբաստիոյ, Կուտինայ եւ առ Բգեշխս Վանայ և սահմանացն Իկոնիոյ. զի Յակոբ Կաթուղիկոսն ուր ուրեք և ընդ ում իշխանութեան գտցի, մանրամասն քննեսցի, և զցրուեալ թուղթսն, որք առիթ են զրպարտութեան և բամբասանաց, անգործադրելի մնացեն. և եթէ հաստատեսցի վկայիւք՝ թէ վնասակար է նա յիրս Արքունի, առնել ըստ օրինաց:

Հասին 'ի Դուռն և այլ թուղթք բողոքանաց 'ի ժողովրդոց Եւդոկիոյ, Ամասիոյ և Գաղատիոյ վասն Յակոբայ Կաթուղիկոսի. թէ մեք յօժարութեամբ հատուցանեմք զսահմանեալ տուրս եկեղեցեաց և վանօրէից մերոց, որ յերուսաղէմ, և աւելի քան զայն ոչ կարեմք հատուցանել. իսկ այժմ Յակոբ Կաթուղիկոսն էջմիածնի, առեալ ընդ իւր զհեծեալս աւելի քան զքսան, եկեալ իջեւանի 'ի տունս մեր արամք և երկարօք, և յախշտակէ զամենայն ուտելիս և ըմպելիս մեր, պահանջելով զոչխարս և զգառինս և զխայտ. դարման երկվարաց և զարօտատեղի, և ժողովեալ ոստիկանաւ զյուրով դրամս, աւելի քան զկար մեր, առաքէ 'ի սահմանս Պարսից. բազմացոյց 'ի վերայ մեր զրկանս և զանիրաւութիւնս, և էարկ խռովութիւն 'ի մէջ ժողովրդոց: Եւ ապա խնդրեն՝ զի ժողովեալ դրամն այն գիտութեամբ իւրեանց առցի 'ի գանձն Արքունի: Եւ հրաման առնել այնպէս, որպէս և խնդրէինն. բայց զգուշացուցանէր զի մի՛ անպատուութիւն ինչ արասցեն Կաթուղիկոսին:

Մատուցին նաեւ դիր ամբաստանութեան աղքատք Հայոց զԿաթուղիկոսէն առ Եպարքոսն 'ի բանակն Արքունի 'ի Տալուտ Փաշա, յորում ասէին. մեք ըստ խնդրոմնաց մերոց ընտրեցաք և կացուցաք զՅովնազար վարդապետ Կաթուղիկոս եւ հաստատեցաւ իշխանութիւն նորա